

Tong yulduzi

Vatan yagonadir,
Vatan bittadir!

N:13 (67178)
2018-yil 26-mart

www.tongyulduzi.uz

Gazeta 1929-yil 1-avgustdan chiqib boshlagan

O'zbekiston Respublikasi bolalar va o'smirlar gazetasi

ISSN - 2010-6092

KO'KLAM ZAVQIN KUYLAYDI BOG'LAR



Biz maysadek ko'karamiz,
Yurtni ko'kka ko'taramiz.

Quyosh kuylar boshimizda,
Tinchlik quvvar qoshimizda.

Rang sochadi bog'-u bo'ston,
Gullab-yashnar O'zbekiston!

AXTAMQULI



Betakror

diyorimizning ajib go'shalarida kezayotgan bahoriy ayyom shukuh yurtdoshlarimiz qalbiga quvonch va shodlik ulashmoqda. Poytaxtimizning Shayxontohur tumanidagi 59-umumta'lim maktabining 2-«B» va 3-«X» sinf o'quvchilari sinf rahbari Vasila opa Rahmonova boshchiligida o'tkazgan bayram sayli ham yig'ilganlarga unutilmas lahzalarni hadya etdi.

- Qo'l jangi sport turi bilan shug'ullanaman. Bo'sh vaqtimda kitob o'qishni yaxshi ko'raman, - deydi poytaxtimizning Bektemir tumanidagi 290-umumta'lim maktabining 1-«G» sinf o'quvchisi Shohruh Ulug'bekov. - Kelajakda yurtga nafim tegadigan inson bo'lish eng katta orzum.

Vatani borning baxti bor,
Mehnati borning taxti.

Insonni ezgulik sari eltuvchi,
ilmning eng yuqori cho'qqilariga

olib chiquvchi kuch bu kitobdir. Darhaqiqat, inson qanchalik bilim olishga qiziqsa, u tomon intilsa, albatta, unga ilm bo'stoniga kirishga yo'l ochiladi.



EZGULIKKA ELTUVCHI YO'L

Shu maqsadda yurtimizda kitobxonlikka katta e'tibor berilmoqda. Bunga Prezidentimiz Shavkat Mirziyoyevning «Kitob mahsulotlarini chop etish va tarqatish tizimini rivojlantirish, kitob mutolaasi va kitobxonlik madaniyatini oshirish hamda targ'ibot qilish bo'yicha komissiya tuzish to'g'risida»gi Farmoyishini misol qilishimiz mumkin. Ushbu hujjatga binoan yurtimiz bo'ylab kitobxonlikka qaratilgan ko'plab tadbirlar bo'lib o'tmoqda. Jumladan, «Eng yaxshi kitobxon» respublika tanlovida bir qancha kitobxon-yoshlar o'z bilimlarini sinovdan o'tkazdi. Bellashuvda g'olib bo'lgan o'quvchilar avtomashina va kitoblar bilan taqdirlandi.

Hozirda bizning maktabda ham «Yangi asarlar taqdimoti», «Eng yaxshi sinf kutubxonasi», «Kitob mutolaasi kuni», «Oilaviy kitobxonlik kuni», «Mening sevimli kitobim»

ma'vularida aksiyalar o'tkazilmoqda. Bunday tadbirlar maktab, oila va mahalla hamkorligida amalga oshirilmoqda.

Joriy yil fevral oyida maktabimizda «Farzandimga kitob sovg'a qilaman» nomi ostida kitob yarmarkasi tashkil etildi.

Yarmarkada o'quvchilar istagan kitoblarni ota-onalari ularga sovg'a qilishdi. Bolalar ko'zlaridagi quvonchni ko'rgan har bir inson qalbida kitobga bo'lgan mehr-muhabbat yanada ortdi. Aynan shu kuni maktabda «Eng yaxshi kitobxon sinf» aksiyasi ham o'tkazildi. Tadbirda 10-«A» sinf o'quvchilari g'olib bo'ldi.

Ma'mura VALIJONOVA,
Namangan viloyati, Pop tumanidagi
16-umumta'lim maktabining
10-sinf o'quvchisi

Tong
yulduzi

ULAR MENING USTOZIM!

Maktabda ma'naviy-ma'rifiy ishlar bo'yicha direktor o'rinbosari bo'lib ishlayman.

Shuningdek, tajriba sinov sifatida ilk bor tashkil etilgan 10-«A» sinf rahbarligi ham mening zimnamda. Ushbu mas'uliyat hissi menga katta vazifalar yuklaydi. Bugun ham bir olam rejalar tuzib, ishga oshiqdim. Davomatning qanday ekanligini yo'lakdagi kuzatuvimning o'zidayoq aniqladim. Faqat o'quvchim Shuhratjon ko'rinmadi. Endigina xavotirlana boshlagan edim, uning uzoqroqdan shosha-pisha kelayotganiga ko'zim tushdi. U menga yaqinlashar ekan, yuzimdagi savolni uqib:

– Singlimni bog'chaga qo'yib kelayapman, – deya gap boshladi.

– Mayli, tezroq darsga kir, – deya unga imladim.

Shu payt qayerdandir Shuhratjonning onasi paydo bo'ldi. Men u ayolga salom berarkanman, Navoiy bobomizning quyidagi satrlari yodimga tushdi:

«Haq yo'lida kim senga bir harf o'qitmish ranj ila,
Aylamak oson emas, haqqin ado ming ganj ila».

Ha, bu mening birinchi ustozim edi. Ularning yuzlaridagi ajinga qarab, yillarning shiddatini his etdim. Ustozim Mavjuda Usmonovaning bugun o'nlab shogirdlari bir jamoada faoliyat olib bormoqda. Men aziz ustozimni gazeta orqali Navro'z bayrami bilan qutlashni shogirdlik burchim deb bildim.

Hamisha sog'-salomat bo'ling, aziz ustozim! Doimo shogirdlar e'zozida yuring.

Obidjon TOSHPOLATOV,
Buxoro viloyati, G'ijduvon tumanidagi
43-umumta'lim maktabining ma'naviy-ma'rifiy ishlar
bo'yicha direktor o'rinbosari

TABIATNI ASRASH O'ZIMIZNI ASRASHDIR

Biz yashab, nafas olib turgan ona tabiat butun insoniyatning uyi, makonidir. Tabiatni ko'z qorachig'idek saqlash, atrof-muhit ifloslanishiga yo'l qo'ymaslik har birimizning burchimizdir.

Tabiat inson va butun mavjudotlarni yashashi, rivojlanishi uchun zarur bo'lgan moddiy-ma'naviy ehtiyojlarni qondiradigan bitmas-tuganmas manba. Biz usiz yashay olmaymiz. Chunki insonlar tabiatning ajralmas qismi sanalamiz.

Hozirda dunyoning yirik shaharlarida ichimlik suvi yetishmasligi, havo zararli moddalar bilan zaharlanayotgani hech kimga sir emas. Yirik shaharlar chiqindilarga to'lib ketganligi tufayli turli yuqumli kasalliklar odamlar orasida tarqalmoqda. Umuman, insonning tabiatga bo'lgan ta'siri katta xavf tug'dirmoqda. U biologik muvozanatning buzilishiga sabab bo'lmoqda.

Shuning uchun ham uni himoya qilish yer yuzidagi barcha insonlarning muqaddas burchi. Har birimiz o'zimiz yashab turgan shahar, mahalla, ko'chani obod qilib, ko'kalamzorlashtirish ishlarida faol ishtirok etsak, borliqni asrashga o'z hissamizni qo'shgan bo'lamiz. Chiqindilarni duch kelgan joyga tashlayotganlarga qarshi kurashsak, atrof-muhitimiz yanada go'zallashib boradi.

Bir so'z bilan aytganda, tabiatni qutqarar ekanmiz, biz o'z-o'zimizni halokatdan xalos etamiz.

Gulchiroy SULTONBEKOVA,
poytaxtimizning Yakkasaroy tumanidagi 48-umumta'lim
maktabining 8-«B» sinf o'quvchisi



YURAKLARDA KO'KLAM NAFASI

**Bolalar varragi xayolni olgan,
Bodom gullaridan quvonadi ko'z.
Dillardan mutlaqo g'ubor yoqolgan,
Xush kelding, bahor,
xush ko'rdik, Navro'z!**

– O'quvchilarimning har biri bilan alohida shug'ullanishga harakat qilaman. Ayniqsa, shunday badiiy kechalarning tez-tez uyushtirilishi, bolalarda Vatani tug'usining shakllanishiga sabab bo'ladi. Shu bilan birga, adabiyotga bo'lgan qiziqishi ortadi, – deydi boshlang'ich sinf rahbari Farida Hammadova.

Ustoz ta'kidlaganiday, poytaxtimizning Shayxontohur tumanidagi 42-umumta'lim maktabida Navro'zga bag'ishlab o'tkazilgan tadbirda har bir o'quvchi faol qatnashdi. Bayram kechasida 1-«B», 1-«I» sinf o'quvchilarining

chiqishlari tomoshaga kelgan ota-onalarga, o'qituvchilarga manzur bo'ldi. Ayniqsa, Husan Qobiljonovning ertak qahramonlarini libosida chiqishi, Almaz Nasibullin, Abdusaid Akmaljonovning bahor haqidagi go'zal she'ri barchaning olqishiga sazovor bo'ldi. Shuningdek, maktab qoshida ochilgan «Sho'x bolalar», «Do, mi, sol» bolalar qo'shiq va raqs guruhi a'zolari – Ruxshona Mullabekova, Parizod Jonibekova, Yasmina Mirpuzalova, Ziyoda Anvarovalar «Toshkentim» deb nomlangan milliy raqslari mahorat bilan ijro etdilar. Ularning iste'dodi yuzaga chiqishida guruh rahbarlari Muniraxon Sharopova, Elvira Sultonovlarning mehnatlari beqiyos. Ushbu kechani tashkilashtirishda ma'naviy-ma'rifiy ishlar bo'yicha direktor o'rinbosari Dilnoza O'ktamovaning xizmatlari katta bo'ldi.

Nigora ABDUNAZAROVA



Xabaringiz bor, bolalik chog'larimdan buyon u-bu narsa «qoralab» kelaman. 5-sinfda o'qib yurgan mahalimda ustoz shoir Abdulla Oripov e'tirofiga tushgan edim. «Bolakay shoir» nomi bilan tilangan «oq yo'l» va undagi umidli so'zlar, mana o'ttiz yildirki, hali-hanuz meni bezovta qilib keladi...

Orif TO'XTASH,
O'zbekiston Yozuvchilar uyushmasi a'zosi

larda chop qilingan bolalar she'riyati yo'nalishidagi bir qancha kitob qo'lim-ga tushdi. Gulandom Tog'ayevaning «Men izlagan kema», Ochil Tohirning «Harflar jamlanmasi», Miltiqboy Xonnazarovning «Bulbul bo'lib sayrayman», Zuhro Begimning «Yurtimiz nihollari» hamda Nabijon Ermatning «G'aroyib qo'shiqlar» nomli risolalari mazkur kitoblarga kiritilgan she'rlarda ham bolalar hayotidan olingan shingil lavhalarga duch kelasiz.

Biroq bir so'zni takror va takror aytishga to'g'ri kelmoqda: bola bo'lol-masak – barchasi bekor! Baayni shu maqsadda maqolani ham shunday nomladim.

Ha, aytganday, butun umrini mana shu nurli yo'lga baxsh eta olgan ustoz ijodkor Tursunboy Adash-boyevning aynan bolalarga she'r yozish mashaqqatini aks ettirgan bir turkum she'rlari ham bor. Masalan:

**Kigizdan qoziq yasab,
Xarsang uzra qoqqanday.
Bolalarday zavqlanib,
Olama ilk boqqanday.**

**Kutilmagan qofiya,
Ko'kda chaqmoq chaqqanday!
Yaxshi kitob uchrasa,
Qaysi bola suyunmas.**

**Suratlardan zavqlanib,
Takror o'qib to'yinmas.
Kichkintoyga she'r yozish,
O'yinchoqmas, o'yinmas!**

Ustoz ijodkor bilan hayotlik payt-larida she'riy aytishmalar qilib tur-rardik. So'zinning oxirida ustozning yuqorida o'qilgan she'riga shogirdlik erkalgiligi bilan nazmiy davom yozgan edim. Xulosa o'rnida ham qabul etish mumkin bo'lgan ushbu she'rni e'tiboringizga havola etsam:

**«Kichkintoyga she'r yozish,
O'yinchoq, o'yin emas».
Lek Tursunboy og'aga,
Bu ish ko'p qiyin emas.**

**Taajjub, bir qarasang,
Yosh bolaga do'nadi.
Yana bir boqsang, soch-u
Qoshiga oq qo'nadi.**

**Kichkintoylar tilini,
O'zlashtirgan boladay.
Salkam sakson bahorni,
Qarshi olgan «bolakay».**

**Nevaralar turishsa,
Biroz gapga bo'ysunmay,
Deydi: – Keling, o'ynaymiz,
Mening o'tim – Tuysunboy!**

**Bolalayga bag'ishlab,
She'y yozaman, bilasiz.
Ulayni o'qiganda,
Qiqiy-qiqiy kulasiz.**

**Siz xayxasha qilmang ko'p,
Jahlim chiqsa, koyiyman.
Do'stingizman va yana –
Tuysun degan shoiyman!**

BOLA O'LOLMASAK BARCHASI EKOR!

Ha, bolalarbop asar yozishning o'zi bo'lmaydi, buning zalvori boshqacha. Bir qarashda bolalarga bag'ishlab yozilgan asarlarni, ayniqsa, qisqa va o'ynoqi she'rlarni o'qirkansiz, ulardagi o'ta oddiy so'zlarni o'qib, «Shuyam she'r bo'ldimi?» deguvchilar ham topiladi. Ammo barchamizni mana shunday azamat adabiyot bag'riga boshlagan, so'zga bo'lgan mehrimizni oshirgan aynan bolalar adabiyoti emasmi?!

Ba'zan uchrashuvlarda «Nega bolalar ijodkorlari kam?» deb so'ra-shadi. Aslida, «Qaysi zamonda bolalar adib-u shoirlari ko'p bo'lgan?» degan savolni javob tariqasida bera-man. Shu savol-javobning o'zi ham bolalarga bag'ishlab ijod qilish juda yengil vazifa emasligini tasdiqlaydi. Qolaversa, buning uchun, avvalo, ijodkor bolalik tasavvurlarini yo'qotib qo'ymasligi kerak.

Xullas, o'tgan 2017-yilda chop qilingan bolalar nashrlariga e'tibor qaratamiz.

Har bir she'r aslida bir topilma bo'lishi kerak. Ustoz ijodkor, O'zbekiston xalq shoiri Anvar Obidjonning bolalar tili bilan aytganda, sermag'iz she'rlarini o'qib, aksariyatini yod olib, shunday xulosaga kelamiz. «G'uncha» jurnalida chop qilingan turkum she'rlaridan misol keltiraman. Tasavvur qilingki, karam tilga kirib, shunday demoqda:

**Menga sovuq qilmas kor,
Qavat-qavat to'nim bor.
Faqat to'nni men qari,
Kiyvolibman teskaril**

«Chumolining maqoli» degan she'rni qarang:

**Yoz bo'yi ishlab,
Qish bo'yi mudra.
Nimani topsang,
Uyingga sudral**

Hozir mana shu she'rlarni o'qiyapman-u, ayni shu kezda yodimga

muhrlanib bo'lganini ham his qilib turibman.

Chinakam she'r baribir ajralib turaveradi. Misol tariqasida shoir Ne'mat Dushayevning «Tong yulduzi» gazetasida chop qilingan «Ketmon» nomli she'rini olaylik:

**Ekinlarni yumshatib,
Hattoki loy qoraman.
Bekor turmay ovulga,
Hasharga ham boraman.**

**Men dehqonga madadkor,
Mehnat qilib tolmangiz.
Yuzimga oyoq qo'yib,
Peshonangiz yormangiz!**

Bu she'rda ketmonning vazifalari oddiy so'zlar bilan sanab o'tilish barobarida o'ziga xos hajv bilan tugallangan. Topilmaga qoyil qolmasdan iloj yo'q!

Shu o'rinda bolalar nashrlarida chop qilingan Abdurahmon Akbarning turkum she'rlarini o'zga bir maroq bilan o'qish mumkin. Shoirning birgina «So'zlovchi yomg'ir» she'ri o'quvchi tasavvurlarini jonlantirib yuboradi. She'rda yomg'ir tilidan aytilgan shunday obrazli so'zlarga duch kelasiz:

**Ishim o'zi shunaqa,
Hamma joyga yog'aman.
Qarindoshman qor bilan,
Shudringvoyga tog'aman.**

**Yaylovdagi suruvdek,
Ko'kda kezib yursak ham.
«Bizlar asli yerlikmiz»,
Deydilar Bulut onam...**

**Hazillashib tortqilab,
Maysalar qulog'idan.
G'ubor-changni yuvaman,
Gullarning yaprog'idan.**

Shu o'rinda sevimli ijodkor, O'zbekiston xalq shoiri Iqbol Mirzoning «Tong yulduzi» gazetasining 2017-yil 1-may sonida «Niyating – pok, ko'ngling –



oq, istagan tomonga oq!» sarlavha ostida chop qilingan tuyuqlarga hamohang bo'lgan bolalarbop turkum ikkiliklarini aytib o'tmoqchiman. Ular topilmalarga boyligi hamda murg'ak tasavvurida bitilganligi bilan e'tiboringizni tortadi. Qolaversa, bu jajji ikkiliklar «Erkatoy – erka toy» nomi ostida kitob holda ham chop qilindi.

Shuningdek, bolalar nashrida Dilshod Rajab, Sodiqjon Inoyatov, Xurram Raimov, Qambar ota, Odil Abdurahmon, Kavsar Turdiyeva, Xudoyberdi Komilov, Qo'zi Ismoil, Turob Yusuf, Olqor Damin, Ernazar Ro'zimatov, Yahyo Tog'a, Nurilla Oston, Turob Niyoz, Bahrom Akbarov, Rauf Subhon, Raim Farhodiy kabi shoirlarning turkum she'rlarini ham zavq bilan mutolaa qilish mumkin. Bundan tashqari, «Gulxan» jurnalida jahon bolalar she'riyatidan tarjimalar berilayotgani ibratli. «G'uncha» jurnalidagi «She'r munchoq» hamda «Gulxan»dagi «Nishona» rukni ostida berilayotgan bir qancha yosh qalamkashlar ijodida ham yangicha yondashuvlar sezilib turibdi.

O'zimning yozganlarim qay darajada bilmadim-u, lekin bir she'rxon sifatida biror tashbehsiz, nogahoniy topilmalarsiz va shu bilan birga, quruq pand-nasihatga yo'g'rilgan bitiklarning hammasini ham she'r hisoblolmayman. Afsuski, nashrlarimizda bu turdagi yozishmalarni ko'plab uchratish mumkin.

2017-yil mobaynda turli nashriyot-

Ilm o'lchovi – aql,
Zehn o'lchovi – naql.

Tong
yulduzi

Orangizda chuqur bilim olib, o'z maqsadlari sari olg'a intilayotgan o'quvchilar juda ko'p. Gulinur Sulaymonova ana shunday intiluvchan yoshlardan biri. U Jizzax viloyati, G'allaorol tumanidagi 87-IDUMning 9-«B» sinf o'quvchisi. Tengdoshingizning orzulari bir olam. U kelajakda tarjimon bo'lmoqchi.

GULINUR TARJIMON BO'LMOQCHI

Gulinurning otasi Komil aka fermer, onasi Ozoda opa esa uy bekasi. Oilada farzandlar barkamol va salohiyatli bo'lib yetishishlari uchun yaqinlari tomonidan alohida e'tibor beriladi. Jumladan, 6-sinfda o'qiydigan Sevinch rasm chizishni yaxshi ko'radi. U sportning kurash turi bo'yicha O'zbekiston chempioni. 3-sinfda o'qiydigan Shahzod va



– Til bilishning zavqi o'zgacha, –
deydi Gulinur ishonch bilan.

6-sinf o'quvchisi Laziz ham sportning kurash turi bilan shug'ullanadi. Bolalarning o'qishi va bo'sh vaqtini mazmunli o'tkazishi uchun Komil aka va Ozoda opa doimo qayg'uradi, ular bilan dildan suhbatlashadi. Gulinurda xorijiy tillarni o'rganishga bo'lgan havas kuchli. Undagi bu tilga bo'lgan mehri 5-sinfda Farida Sultonova uyg'otgan. O'qituvchining nemis tilda ravon so'zlashi barcha o'quvchilar qatori uning ham havasini keltirgandi. Bora-bora bu havas doimiy mashg'ulotga aylandi. Bu tilda so'zlashayotgan xalqning urf-odat, tarixi, madaniyati, san'atini chuqur o'rgandi. Darsdan bo'sh qoldi deguncha, ustozni ko'magida nemis tilidagi matnlarni o'qish va so'zlash, tarjima qilish bilan shug'ullandi. Nemis tili bo'yicha o'tkazilgan «Bilimlar bellashuvi»da 2-o'rinni egalladi. Ta'lim yo'nalishi bo'yicha Zulfiya nomidagi davlat mukofoti respublika bosqichida ishtirok etdi.

– Til o'rganish – koni foyda, – deydi Gulinur. – Bu yutuqlarga erishishda ustozim Farida Sultonovaning o'rni beqiyos. Ularning fidoyiliklaridan ruhlanib, «Ustozga ta'zimdaman» nomli maqola yozdim. Bu maqola «G'allaorol ovozi» gazetasida chop etildi. Shuningdek, oilamizda kitob o'qishga, ilm o'rganishga bo'lgan mehr juda baland. Bolalikdan qilingan orzu-havas, albatta, amalga oshadi, deyishadi. Biz Gulinurning orzulari qanot yoyishiga ishonamiz.

Nodira NAZAROVA

Qadimdan xalqimiz orasida tabiat bilan bog'liq biri-biridan chiroyli bayramlar, an'analar mavjud. Shulardan biri Navro'z ayyomidir.

MEN BAHORGI TA'TILDA...

Bu fayzli bayram jonajon diyorumizda keng tantana qilinadi. Bahorni sog'ingan xalqimiz tabiat qo'yniga oshiqadi, shahar-u qishloqlarda sayllar bo'lib o'tadi.

Jumladan, bizning bilim dargohimizda ham Navro'zi olamga bag'ishlangan tadbir o'tkazildi. Unda milliy urf-odatlarimiz, qadim qadriyatlarimiz, an'analarimiz aks ettirilgan sahna ko'rinishlari namoyish etildi. O'quvchilarning musiqiy chiqishlari tadbirga o'zgacha fayz bag'ishladi.

Bayramdan so'ng ona tili va adabiyot fani o'qituvchilarimiz bizni bahorgi ta'tilga kuzatarkan, ko'proq kitob o'qishimizni, ta'til taassurotlari haqida hikoya yozib kelishimizni tayinladi.

Men ta'til kunlarini buvijonimnikida o'tkazdim. Buvimni mahallada bo'ladigan Navro'z bayramiga taklif qilishdi. Odatga ko'ra, bunday tadbirlarga quruq qo'l bilan borib bo'lmaydi. Buvim yalpizli somsa yopdilar, men esa ularga yordamlashdim. Buvijonimnikida badiiy kitoblar juda ko'p. Ta'til davomida bir nechta kitob o'qidim. Yana ko'k somsa, chuchvara tayyorlashni ham o'rganib oldim. Xullas, bahorgi ta'til kunlarim besamar o'tmadi.

O'dina MUHAMMADJONOVA,
Respublika ixtisoslashtirilgan musiqa va
san'at litseyining
5-«E» sinf o'quvchisi

OTA-ONA – HAYOT BOG'BONI

Dunyodagi eng shirin ne'matlardan biri, shubhasiz, farzandir. Har bir ota-ona uchun umri davomida eshitadigan eng yaxshi so'z – farzandi orqasidan «Ota-onangga rahmat», degan so'zdir.

Farzand dunyoga kelgach, avvalambor, unga go'zal ism qo'yamiz. Hech kimdan kam bo'lmay unib-o'sishi uchun tinim bilmay mehnat qilamiz. Orzu-havaslariga berilib, hashamatli uylar quramiz, dabdabali to'yalar qilamiz. Ammo farzandlarimizning kelajagi uchun faqat shularning o'zi muhim, desak, adashgan bo'lamiz.

Qadimdan dono xalqimiz farzandlarni bog'dagi yosh nihol-larga, ota-onani esa bog'bonga mengzaydi. Bog'bon har bir yosh niholni mehr bilan parvarish qilib doimo e'tibor qaratsa, vaqti kelib, u katta daraxtga aylanadi. Bolaga ham, avvalambor, ota-ona go'zal tarbiya berib, yuksak ta'lim olishi uchun sharoit yaratmog'i lozim. Shunda har bir bola o'zining hayot yo'llarini to'g'ri tanlay oladi. Kelajakda oilasi, Vatani ravnaqi uchun o'z hissasini qo'shadigan inson bo'lib yetishadi, ezgu ishlarining davomchisiga aylanadi.

Shuning uchun ham yurt xizmatiga bel bog'lab, ota-onasi xalqining ishonchini oqlaydigan, jismonan sog'lom, ma'nan yetuk, har tomonlama barkamol o'g'il-qizlarni komil inson etib tarbiyalash barchamizning muqaddas burchimizdir.

Rahima SAYFIYEVA,
Navoiy viloyati, Qiziltepa tumanidagi
8-umumta'lim maktabining
boshlang'ich sinf
o'qituvchisi

Qarshi davlat 2-ixtisoslashgan umumta'lim maktab- internatida iqtidorli yigit-qizlar ko'pchilikni tashkil qiladi. 10-«A» sinf o'quvchisi Sitara Raupova ana shunday a'lochi va jamoatchi qizlardan.

A'LOCHI QIZ SITORA

Sitora bilan suhbatimiz maktabning «Madaniyat va ma'rifat» xonasida kechdi. – Yoshligimdan chet tillarni o'rganishga astoydil kirishganman, – deydi Sitara.

– Rus tili fani o'qituvchimiz Dilbar G'aniyeva meni fan Olimpiadalariga tayyorlab bordilar. Sinovlarga jiddiy tayyorgarlik ko'rdik. 8-sinfda rus tili fanidan shahar bosqichida 1-o'rinni egallab, viloyat bosqichida 2-o'rinni olishga erishdim. Shunda bilimdon, intiluvchan tengdoshlarim juda ko'pligini anglab yetdim.

Uning o'qituvchi, tarbiyachilari bilan suhbatlashganimizda, ustozlar Sitoredek odobli, aqlli, a'lochi va har bir ishda namunali o'quvchilari borligi bilan faxrlanishlarini aytishdi.

Sitora bilan maktab-internatida yaratilgan sharoitlar bilan tanishib, sinfxonalarni ko'zdan kechirdik, yotoqxona, kutubxona va sport zalida bo'ldik. Bu yerda o'quvchilarning ta'lim va tarbiya olishlari uchun barcha sharoitlar yaratilganining guvohi bo'ldik. Ozoda, yorug', shinam sinfxonalar, lingofon xonalari, kitob, o'quv

qo'llanmalarga boy axborot-resurs markazi o'quvchilarning xizmatida.

Yana bir jihat: Sitara ingliz tili bilan ham jiddiy shug'ullanadi. U o'zbek tilidan ingliz tiliga novella, kichik hikoyalar tarjima qilayotgani, hozirda o'zbek xalq dostonlaridan «Rustamxon»ni inglizchaga o'g'irishni boshlagani haqida gapirib berdi. Maktab-internatning faxri bo'lgan Sitara sport gimnastikasi bilan ham shug'ullanadi. Badiiy kitoblar mutolaasiga ham vaqt ajratishini aytmayisizmi... Uning sevim o'qiydigan asarlari – «O'tkan kunlar», «Yulduzli tunlar», «Me'mor», ardoqli shoirlarimiz Abdulla Oripov va Erkin Vohidovning she'rlari.

Bilimdon o'quvchi Sitara Raupovaning kelajakdagi orzulari juda ko'p. U xalqlarni bir-biriga yaqinlashtiradigan, do'st-birdar qilishdek kuch-qudratga ega bo'lgan tarjimonlik kasbini egallashni o'z oldiga maqsad qilgan. Sitoraning bu yo'ldagi ezgu ishlariga omadlar tilab qolamiz.

Yusufjon HAMDAMOV

The weak can never forgive.
Forgiveness is the attribute of
the strong.

Mohandas Mahatma GANDHI

ZAVQLI DARS

Abdullo ingliz tilini juda yaxshi ko'radi. Bugun uning sevimli fanidan ochiq dars bo'ladi.



Ustoz Ziyoda opa No-sirova turli ko'rgazmali qurollar va multimedia vositalari orqali qiziqarli dars o'tadi. Biz esa sizni poytaxtimizning Shayxontohur tumanidagi 316-umumta'lim maktabining 4-«A» sinf o'quvchilari bilan birgalikda «How did you get

here today?» mavzusini o'rganishga taklif etamiz. Mavzuga ko'ra o'quvchilar bugun qaysi transport vositasi yordamida maktabga kelganlari va ularning nomlarini birma-bir aytib berdi. So'ng, o'qituvchi ana shu vositalar yordamidagi harakat haqida gap ketganida **on foot**, «piyoda bormoq» jumlasida esa **by car** predloglari qo'llanilishini tushuntirdi. Shundan so'ng, Mastura Rustamxo'jayeva, Ibrohim Olimov, Muxlisa Ismoilboyeva, Rayona Husanova va Robiya Odiljonova kabi zukko o'quvchilar mavzuga oid quyidagi gaplarni tuzishdi:

I get here on foot today.
I get here by car today.

Ta'lim maskaniga kelganimizdan xabar topgan 3-«A» sinf o'quvchilari ham bizni sinfxonalariga chorladi. Ular ham ustozlari Saodat Nurmatova boshchiligidagi ochiq dars tashkil etishgan ekan. Bizni quvonch bilan qarshi olgan o'quvchilar davlatimiz madhiyasini ingliz tilida aytib berishdi. So'ng, ustoz «Brush your teeth» mavzusidagi ochiq darsni boshladi. Bolajonlar tish tozalash, sochni tartibga keltirish kabi harakatlarni ingliz tilida ifodalashni o'rganishdi. Mavzuga oid so'zlarni qo'shiq tarzida ijro qilgan o'quvchilar

qiziqarli darsdan bir olam taassurot oldi. Risolat Husanova, Zaynab Qosimova, Mumtoza Shuhratovaning burro javoblaridan bolajonlar darsni yaxshi o'zlashtirishganligiga amin bo'ldik.



Ana shunday zavq-u shavq bilan til o'rganayotgan ilmga chanqoq o'quvchilarni bugun ham gazetamizdagi «Ingliz tilini o'rganamiz» sahifasidagi ajoyib dars bilan tanishishga taklif etamiz.

Sayyora QODIROVA

ORZULARI QANOT YOZGAN QIZ

Dinara Qoraqalpog'iston Respublikasi Qo'ng'iro't tumanidagi 54-umumta'lim maktabining 3-sinf o'quvchisi, u qozoq tilida tahsil oladi.

Dinara orzulari bir olam. O'z ustida tinimsiz ishlashdan tolmagan qizaloq maktabda tashkil etilgan musiqa, shaxmat-shahka, do'mbira, raqs kabi to'garaklarda o'z mahoratini ko'rsatib kelmoqda. Dinara Baxtibaeva Navro'z bayrami munosabati bilan o'tkazilgan tadbirlarda o'zining Lazgi raqsi bilan tomoshabinlarni hayratga soldi. Sportning basketbol turi bo'yicha maktablar aro o'tkazilgan musobaqada 1-o'rinni egallab, respublika bosqichiga yo'llanma oldi. Elda «Intilganga tole yor» degan maqol bor. Orzulari qanot yozgan qizimizga baxt hamisha hamroh bo'lishini tilaymiz.



A. KARIMOV

Lesson 13

HOW MANY TYPES OF MONEY DO YOU KNOW?

Full fill the gaps.

- In school, it is fee
- In court it is ...
- In divorce...
- When we pay the government, it is ...
- Employer to workers it's...
- When you borrow from bank, it's ...
- Illegally received in the name of service, it is ...
- When you dedicated to poor people...




Bribe, salary, alimony, fines, loan, donation, tax

FEELINGS BINGO

Look at the pictures and match his feelings.

Angry, hot, cold, confused, happy, sleepy, scared, bored, sad



Ma'mura G'ULOMOVA

CLOUDY GRAMMAR

Read the grammar and match the answer.

Noun	is used in place of a noun.
Pronoun	describes a noun or pronoun.
Adjective	shows an action.
Adverb	name of person, place thing or idea.
Verb	modifies a verb.

Painter: Sumbula MELIMURODOVA

Dinora ABDULLAJONOVA

VATAN

Tug'ilib o'sgan go'sham,
Bu Vatanim bo'ladi.
Doim bag'rida bo'lsam,
Dil quvonchga to'ladi.

Xalqimiz zo'r – mehmondo'st,
Chetlab o'tar kam-u ko'st.
E'zozdadir keksalar,
Bag'rimizga kelsalar.

Yigitlari pahlavon,
Ayamas yurt uchun jon.
Bog'larimiz bepoyon,
Doim to'kin dasturxon.

Gulxumor ABDUXALILOVA,
Andijon viloyati, Buloqboshi
tumanidagi 15-umumta'lim
maktabining 6-«B» sinf o'quvchisi



SHUKRONA

Oshxonada ovqat tayyorlab,
Birdan «voy» deb qoldilar oyim.
Shoshib qo'llariga qarasam,
Ari chaqibdi! Yo, Xudoyim!

Zumda shishib chiqdi qo'llari,
Og'riq kuchli bo'lishi tayin.
Lekin oyim sochimni silab,
So'zlardilar jilmayib mayin:

«Bolalarim, xavotir olmang,
Qo'rqitgan bo'lsam, ming bor uzr.
Yaxshiyamki, sizga tegmadi,
Ari meni chaqibdi, shukur».

E'zoza USMONXO'JAYEVA,
Toshkent shahar, Shayxontohur
tumanidagi 34-umumta'lim
maktabining 9-«V» sinf o'quvchisi



ENG OLIY ORZU

Orzular osmonida,
Misli qush bo'lib uchsam.
Barcha tilaklarimga,
Men ham, albatta, yetsam.

Eng oliy tilagimdir,
Vatanim tinch, yo'qdir g'am.
Yurt tinchligin asrashga,
Bo'layin doim hamdam.

Roza HAMZAYEVA,
Samarqand viloyati, Qo'shrabot
tumanidagi 24-umumta'lim
maktabining 7-«B» sinf o'quvchisi

«NABIRAMGA MAKTUBLAR» TURKUMIDAN

(Davomi. Boshi o'tgan
sonlarda)

Ba'zan keksalardan shunday
yozg'irishlarni eshitib qolaman: «E,
hozirgi bolalarni, hammasi olim-u
dono, quloqsiz, yuzlari ham ochilib
ketgan!» O'ylanib qolaman. Nimagadir
bu gapning bir uchi menga ham tegib
ketadi. Chunki «hozirgi bolalar» ichida
sen ham borsan-da. Bilasanmi, men

seni o'z tengdoshlaringdan ustun
ham, kam ham qo'yolmayman. Bir
qortarda ko'raman. Meni nabiram
unaqamas, boshqasi bilan nima
ishim bor, deyishga haqqim yo'q.
Axir shunday gullab turgan Vatanni
qandoq qilib «quloqsiz, yuzlari ham
ochilib ketgan»lar qo'lga tashlab
ketish mumkin?! Men bu savolga
bolalarni yozg'irib aytilgan so'zlarning
o'zidan javob izlayman. Axir odam
bir vaqtning o'zida ham olim, ham
dono, ham quloqsiz bo'lishi mumkin-
mi? Yo'q! Aslida olim-u dono bilan
donolarcha gaplashish kerakmasmi?
Aksincha bo'lsa, albatta, quloqqa gap
kirmaydi-da. «Yuzlari ham ochilib
ketgan» degan gapni esa hecham
hazm qilib bo'lmaydi. Bu hayosiz,
behayo degani bo'ladi. Men bun-
ning o'rniga yuzlari emas, «ko'zlari
ochiq» degan bo'lardim. Sababi,
hozirgi bolalar olamga ochiq ko'z

bilan qaraydilar. Ko'p narsa biladilar.
Bizlar bolaligimizda kattalar mana
bu ishni qilsang savob bo'ladi,
qilmasang gunoh bo'ladi, desalar,
savobini qilib ketaverardik. Nega,
nimaga degan savolni berishni
bilmasdik. Hozirgi bolalarga «oq»
desak oqni, «qora» desak qorani
tushuntirib berishimiz kerak. Ular
hamma narsani tub mohiyati bilan
bilishni istaydilar.



Erkin MALIK,
O'zbekiston Respublikasida
xizmat ko'rsatgan jurnalist

OLIM-U DONO BOLAM

Yana tungi muolajalar
ko'ngildagidek bo'li-

shi uchun sen kamida sakkiz soat
uxlashing zarur. Mo'ljaldan bir soat
kam uxlasang ham «operatsiya»
oxiriga yetmay qoladi. Bu surunkali
davom etaversa, bir kasallikka olib
boradi».

Bu gaplarim senga qattiq ta'sir
qildi. O'sha kundanoq shu reja va
tartibga o'tding. Dars tayyorlashlar
saharga ko'chdi. Shunda sen nima
deding:

«Dadajon, kalam yomg'irdan
keyingi osmonga o'sshab tiniq bo'lib
qoldi, miyam soatdek tez ishlayapti.
Kechqurun ikki soatda qiladigan
darsimni, erta bilan bir soatda qilib
qo'yyapman», deb o'zing e'tirof
qilding. Ana shunaqa, mening olim-u
dono bolam. Yigirma birinchi asr ilm
asridir. Bu qush tilini qush biladi,
deganidir. Sizlar hur Vatanning erkin
qushlarisiz...

(Davomi bor)



MUHAMMAD
YUSUFNI TOPDIM...

Muhammad Yusufni izlab, kun choshgohdan o'tgandan keyin uylariga
bordim. Eshik qo'ng'irog'ini bosdim. Eshik oldida sochlari jingalak, keng
yag'rinli, polvonsifat yigitdan:

– Muhammad Yusuf sizmisiz, – deya so'radim.
– Ha, menman, – deya javob berdi qarshimdagi
xushsurat yigit.

Salom-alikdan keyin Muhammad Yusufning dars-
xonasiga kirdik. O'rtadagi xontaxta ustida kitoblar
qalashib turibdi. Men xontaxta yoniga to'shalgan
baxmal ko'rpachaga o'tirdim. Muhammad Yusuf bilan
uning o'qishlari, do'stlari haqida suhbatlashdik. So'ng,
u sevimli shoiri Muhammad Yusuf ijodidan yod olgan
bir she'rni o'qidi:

**Mendan nima qolar:
Ikki misra she'r,
Ikki sandiq kitob,
Bir uyum tuproq...**

Bu ajib misralarni tinglab, xayolga cho'mdim. Yosh
Muhammad Yusufning ko'zlariga boqdim, uning xayoli
o'ushida qo'shilib oqdim. Beixtiyor O'zbekiston xalq shoiri
Halima Xudoyberdiyevaning she'ri ko'nglimdan kechdi:

**Bir arsloni o'tdi O'zbekning,
Ohi ko'kka yetdi O'zbekning.
Quyosh yig'la, osmon aza tut,
Muhammadi ketdi O'zbekning...**

– She'r yozishni Muhammad Yusufdan o'rganishga
intilaman, ustozning she'riy kitoblarini yostig'im tagiga

qo'yib yotaman, – deydi yosh Muhammad Yusuf. So'ng,
u o'zining xomaki she'rini yoddan o'qiydi:

**Vatanim, oh, mening ko'zim,
Dilimda oh, orli so'zim.
Yolg'on bo'lsa aytgan so'zim,
Oqib tushsin ikki ko'zim...**

Unga ota-onasi yaxshi niyat bilan bu ismni qo'ygani
bejiz emas. Shoir Muhammad Yusufning ko'plab sado-
qatli muxlislari, shoirga bo'lgan cheksiz hurmatlarining
belgisi sifatida o'g'illariga Muhammad Yusuf deb ism
qo'yishgan. Yillar o'tib, «Muhammad Yusuf» qo'lga
qalam olsa, o'zbek adabiyoti bo'stonida yangi yulduzlar
paydo bo'lishi aniq.

Shoir Muhammad Yusuf o'zining o'lmas she'rlari
bilan Vatani ko'ksida, xalqning yodida, Muhammad
Yusuf dilida, avlodlar silsilasida, shogirdlar qalbida
ustoz bo'lib asrlar osha yashaydi.

Ha, aytgancha, yosh shoir bilan gurgunga berilib,
uni tanishtirish yodimdan ko'tarilibdi. Muhammad Yusuf
Davron o'g'li 15 yoshda. U kelajakda xalqimizning sevimli
shoiri Muhammad Yusuf kabi milliy adabiyotimizdan
munosib iz qoldirishni maqsad qilgan. Biz bo'lajak
shoirlarga beg'ubor orzulari ushlishiga tilakdoshmiz.

Nasriddin ISMOILOV,
Surxondaryo viloyati, Denov tumani

Avvallari o'zbek qizlarining badiiy gimnastika sport turi bilan shug'ullanishi, musobaqalarda ishtirok etishiga ularning yaqinlari, ayniqsa, ota-onalari qattiq qarshilik ko'rsatar edi. Quvonarlisi, keyingi yillarda xalqimiz orasida bu masalaga munosabat ijobiy tomonga o'zgardi.

JAMILANING SHOGIRDLARI xalqaro musobaqada g'olib bo'ldi



Mamlakatimizda qizlar sportiga ko'rsatilayotgan yuksak e'tibor natijasida endi ota-onalarning o'zlari farzandlarining qo'llaridan yetaklab mashg'ulotlarga olib bormoqda. Buning samarasi o'laroq, sport malikalari-miz Osiyo va jahon chempionatlari, boshqa nufuzli xalqaro musobaqalarda ona

Vatanimiz sharafini munosib himoya qilib kelmoqda.

Ana shunday iste'dod egalardan biri Jamila Rahmatovadir. Nafaqat yurtimiz, balki jahon sporti muxlis-u mutaxassislari ham ushbu nomni juda yaxshi tanishadi. Jamila badiiy gimnastika bo'yicha o'tkazilgan ko'plab qit'a va jahon miqyosidagi turnirlarda munosib ishtirok etib, shohsupaning eng yuqori pog'onasidan joy egallagan. Qarangki, so'nggi yillarda u yosh avlodga sportdagi bilimlarini chuqur o'rgatib, yangi-yangi nomlarni kashf etishga intilmoqda.

Kuni kecha Qozog'istonda badiiy gimnastika bo'yicha bolalar o'rtasida o'tkazilgan «KERBEZ CUP – 2018» xalqaro turnirida Jamilaning yosh shogirdlari munosib ishtirok etib, yakunda 5 ta oltin hamda 2 ta kumush medalni qo'lga kiritdi.

Jumladan, Arina Petrova, Sora Nurmatova, Jamila Jalilova, Zebo Yoqubova, Samira Boqiyeva shohsupaning birinchi pog'onasidan joy oldi. Ularning chiqishlari mahalliy muxlislarda katta taassurot qoldirdi. Shuningdek, yana ikki nafar yosh atletimiz kumush medal bilan taqdirlandi.

S. TURSINOV

TAEKVANDODAN O'Q OTISHGACHA...

Joriy yilning 18-fevralida Toshkent viloyati, Nurafshon shahar bolalar va o'smirlar sport maktabida ochiq chempionat o'tkazildi. Sportning taekvando VTF turi bo'yicha bo'lib o'tgan musobaqada 90 nafarga yaqin 6–18 yoshli sportchi o'zaro bellashdi.

Nurafshon shahridagi 32-umumta'lim maktabining 2-sinf o'quvchisi Islombek Karimboyev 25 kg vazn toifasida 1-o'rinni egalladi.

– Islombek Parkent tumani vakili bilan gilamga chiqqanda, juda hayajonda edi. Biroq o'ziga bo'lgan ishonch hissiyatlarini jilovlashda qo'l keldi va raqibidan ustun chiqdi, – deydi murabbiy Hilola Qurbonova.





musobaqasida Rustam 71 ochko jamg'arib, esa 3-o'rinni egalladi.

O'zbekiston Respublikasi Mudofaasiga ko'maklashuvchi O'rta Chirchiq tumani «Vatanparvar» o'quv sport texnika klubi o'q otish va yozgi biatlon to'garagida mohir sportchi-merganlar shug'ullanishadi. Nurafshon shahridagi 48-umumta'lim maktabining 5-sinf o'quvchisi Rustam G'ofurov hamda 8-sinf o'quvchisi Temur Abilxayirov murabbiy Leonid Yugayning iqtidorli o'quvchilaridan sanaladi. Joriy yil Vatan himoyachilari kuniga bag'ishlab o'tkazilgan sport

Muhammadsodiq ALIMOV

FARG'ONALIK CHEMPIONLAR

– Maktabimizda 500 nafardan ziyod yigit-qiz badiiy gimnastika hamda sport gimnastikasi bilan shug'ullanadi, – deydi Farg'ona shahridagi ixtisoslashtirilgan bolalar va o'smirlar olimpiya zaxiralari gimnastika maktabining murabbiyi, «Shuhrat» medali sohibi Yelena Drujinina.

Yaqinda poytaxtimizda o'tkazilgan respublika musobaqasida mamlakat kubogi uchun bo'lgan bellashuvda Anastasiya Murashnichenko mutlaq g'oliblikni qo'lga kiritdi. Shuningdek, maktab o'quvchisi Mohinabonu To'lanova ham sovrinli o'rinni egalladi.

Bundan tashqari, poytaxtda o'tkazilgan trampoline bo'yicha bo'lgan respublika ochiq chempionatida ham maktabning 4 nafar sportchisi g'oliblar safidan o'rin egalladi.

Muhammadjon MAHMUDOV, Marg'ilon shahri

Ta'lim maskanimiz «Jasorat maktabi» maqomiga erishdi. Endilikda chuqurlashtirilgan sport sinfida o'quvchilarimiz o'z iqtidorlarini toblab borishadi. 1-«B» sinf o'quvchisi Amir Temurxon qo'l jangi, dzyudo, milliy kurash sport turlari bo'yicha o'tkazilgan turli musobaqalarda muvaffaqiyatli ishtirok etib kelmoqda. Uning medallariga sinfdoshlari havas bilan boqishadi. Akasi Alisher esa sport sinfining sardori.



JAJJI POSBON

Darslarda a'lo baholarga o'qiyotgan kichik chempion adabiyot faniga qiziqadi. U Muhammad Yusufning bir nechta she'rlarini yod olgan. O'zi ham ustoz Lobar Qurbonova ko'magida she'r yozishni mashq qiladi. Quyida yosh sportchi Amir Temurxonning ana shunday mashqlaridan biri bilan tanishishingiz mumkin.

Vatanimga siz posbon,
Siz bilan sofdir osmon.
Ko'ksingiz erur qalqon,
Men uchun siz qahramon.

Mohin OMAROVA,
Toshkent shahar, Yashnobod tumanidagi 153-umumta'lim maktabi o'qituvchisi



GULZOR QIROLINI

BILASIZMI?

Alisher Navoiy no-midagi O'zbekiston Milliy kutubxonasi nashriyoti yaqinda bolalar shoiri Nabijon Ermatning o'simliklar dunyosiga bag'ishlangan «Alifboli tez aytish va topishmoqlar» kitobini chop etdi.

Shoirning bolalar va o'smirlarga atab o'ndan ortiq kitoblari nashr etilganligini yaxshi bilamiz. Yangi kitob esa Nabijon Ermat ijodida yangilik bo'lganini alohida ta'kidlamochimiz. Chunki shoir o'simliklar dunyosi haqida alifbo orqali tez aytish va topishmoqlarni qalamga olarkan, har bir giyohni chuqur o'rganganligi sezilib turibdi. Kitobdan o'rin olgan ijod namunalarida o'simlik turlarining tabiatda tutgan o'rni, ahamiyati va shifobaxshligi alohida ta'riflanadi.


Jumladan, «Umidim nihollari» she'rida shunday satrlar bor:

**Alifbo tartibida,
Tez aytishlar jamladim.
To'qib ko'p topishmoqlar,
She'rim mustahkamladim.**

Haqiqatan ham kitobdan o'rin olgan tez aytishlar, topishmoqlarni o'qib, o'simliklarning beqiyos dunyosiga sayohat qilasiz. Giyohlar haqidagi qiziqarli ma'lumotlarni bilib olasiz. Masalan, quyidagi topishmoq orqali ham bu boradagi bilimlaringizni mustahkamlaysiz.

**Gulzorimiz qirol,
Rangi qizil, sariq, oq.
Uch qo'shaloq bargi bor,
Tikani tirnar ozroq.
Chiroyiga yo'q qiyos,
Bu qaysi gul, ayt, G'iyos?!**

Shoir Nabijon Ermatning yangi kitobi siz aziz o'quvchilarga manzur bo'lishiga ishonamiz.



Nigora JO'RAYEVA



(Badia)

Ona... Olamdagi eng go'zal, eng yoqimli so'z. Bu so'zni eshitganda, ko'z oldimizga dunyoning eng yorqin ranglari, dimog'imizga eng xushbo'y gullarning ifori keladi, qulog'imizda qalb kuyi – alla taraladi. Bu so'zni aytganimizda, yuragimizdan mehr-muhabbat bulug'i ochgandek, go'yo...

Bu mavzu uzoq asrlardan buyon shoir-u allomalar, musavvir-u faylasuflarni o'yga toldirmoqda. Sababi juda oddiy. Har bir insonga o'z onasi eng buyuk zotdir. Onaga mos ta'rif berish esa quyoshga yetib bormoqdek mushkuldir. Shunday bo'lsa-da, ko'p insonlar

ona so'zini quyosh bilan ifoda etadi. Ammo quyosh samolarda faqat kunduz kuni nur sochadi, yorug'lik ulashadi. Tunda esa tog'lar ortiga g'arq bo'lib, uyquga ketadi. Onalar-chi, xoh kech bo'lsin, xoh kunduz, qalbidan mehr nurlari taratib turishadi. Hatto tunda ham onalarimizdan muhabbat shu'las taraladi. Shunday ekan, bundan keyin ham onajonlarimiz nomi dillarda doston bo'lajak.

Navro'za TURSUNOVA,
Sirdaryo viloyati, Guliston shahar
6-umumta'lim maktabining
8-sinf o'quvchisi

BO'SH O'TIRMAY, BOSH QOTIR!

«Ona» so'zi mushoira,
So'zlar bog'lab ko'p shoira.
Bosh harflarning yig'indisi,
So'z boshlovchiga ishora.

1				O	N	A
2				O	N	A
3				O	N	A
4				O	N	A
5				O	N	A
6				O	N	A

Tuzuvchi: Anvar MIRZAZODA,
Zangiota tumani

PIYOZ SIZNI «YIG'LATSA» AGAR...

FOYDALI MASLAHATLAR

**Qanday qilib «ko'z yoshni to'kmasdan» piyoz to'g'rash mumkin?
Har qanday uy bekasining doimiy muammosi – qanday qilib «yig'lamas»dan piyoz to'g'rash mumkin?**

Balki bizning bir nechta oddiy maslahatlarimiz bu qiyinchiliklardan qutulishga yordam beradi.

1 Agar buning iloji bo'lsa, piyozni oldindan 30 daqiqa sovitgichga qo'ying. Sovuq muhit oltingugurt birikmasining tarqalishiga to'sqinlik qiladi. Lekin piyozni doimiy ravishda sovitgichda saqlash tavsiya qilinmaydi, chunki bu piyozning yumshab qolishiga va chirishiga olib keladi.

2 O'tkir qilib qayralgan pichoq piyoz hujayralarini shikastlanish darajasini, ya'ni oltingugurt ajralib chiqishini kamaytirishga yordam beradi.



3 Pichoqni vaqti-vaqti bilan sovuq suvda ho'llab turish kerak. Suv oltingugurt ta'sirini kamaytirishga yordam beradi. Shuningdek, tozalangan piyozni oqib turgan suvga ivitib qo'yish tavsiya qilinadi, lekin ko'p vaqtga emas, chunki suv piyozni biroz yumshatadi va buning natijasida uning ta'mi o'zgarishi mumkin.

4 Piyozni to'g'rashda ildizini kesib yubormang – aminokislotalarning eng katta miqdori aynan uning ichida joylashgan bo'ladi. Bunday «achchiq» bilan duch kelganda, ko'z yoshlaridan qutulishga imkon beradigan maslahatlarning eng kichik qismidir. Ular sizga, albatta, yordam beradi va gar sizda ko'z yoshlari paydo bo'lsa, unda u faqat quvonch tufayli yuzaga keladi, deb umid qilamiz.

NARGIZA tayyorladi